

ՀԱԿՈՐ ՍՆՀԱԿԻ ԵՐԵՄՅԱՆ (1908—1955)

Սույն թվի նույնամբերի 21-ին, երկարատև ու ծանր հիվանդությունից հետո, վախճանվեց հայրենադարձ մտավորական Հակոբ Սահակի Արամյանը:

Հակոբ Արամյանը ծնվել է Անտիոք քաղաքում (Ալեքսանտրիտտայի շրջան) 1908 թվին:

1915 թվի համահայկական կոտորածների ժամանակ Արամյանը ծնողների հետ տեղափոխվում է Սիրիայի Համա քաղաքը, որտեղ ապրում է 4 տարի, այնուհետև անցնում է Ալեքսանտրիտտա, որտեղ սովորում է հայկական նախակրթարանում և ավարտում այն:

1923 թվին Արամյանների ընտանիքը փոխադրվում է Կահիրե: Արամյանը այստեղ մտնում է Գալստյան ազգային վարժարանը, որն ավարտելուց հետո հաճախում է Ֆրանսիական լիսե: Ֆրանսիական լիսեից շրջանավարտ լինելով ուսումնասիրում է իրավաբանություն: Սակայն, 1936 թվին, հորը մահվան պատճառով ստիպված է լինում ուսումը կիսատ թողնել և, մորն ու եղբորը հոգսը իր վրա ունենալով, զբաղվում է գրական աշխատանքներով: Նա սկսում է աշխատել «Արև» օրաթերթի խմբագրությունում որպես սրբագրիչ՝ բանաստեղծ Վահան Թեքեյանի խմբագրության օրով: Թեքեյանի մոտ հմտանում է խմբագրության մեջ և դառնում թերթի եռանդուն աշխատակիցներից մեկը և պայքար մղում Սովետական Հայաստանի հակառակորդ հոսանքների դեմ: Թեքեյանի մահից հետո Արամյանը մնում է «Արև» թերթի խմբագրության մշտական աշխատակից և թերթը ղեկավարում:



1945 թվի Ազգային-եկեղեցական ժողովի գումարման և երջանկահիշատակ Գեորգ Զ. Հայրապետի կաթողիկոսական ընտրության ժամանակ Արամյանը մասնակցում է եգիպտահայ պատվիրակության՝ որպես «Արև» օրաթերթի խմբագրատեղի և թղթակից:

Հայաստանից վերադառնալով եգիպտոս, նա որպես ջերմաշունչ հայրենասեր Սովետական Հայաստանի գովեր է շնչորում եգիպտահայության մեջ:

Արամյանը 1945 թվի վերջերին, որպես համոզված հայրենասեր, եգիպտահայերին

հորդորում է վերադառնալ Մայր Հայրենիք և անձամբ օրինակ հանդիսանալով գլխավորում է 1947 թվի ներգաղթի եգիպտահայ առաջին քարավանը:

Արամյանը Հայրենիքում նույնպիսի խանդով աշխատում է օգտակար լինել իր շրջապատին. աշխատակցում է «Սովետական Հայաստան» և «Էջմիածին» ամսագրերին և հայրենադարձ երիտասարդության զանազան ասպարեղներում գտած հաջողությունների ու Հայրենիքի վերաշինության գովեր է հյուսում հիշյալ ամսագրերի էջերում:

Արամյանն ունի մի շարք մանր բանաստեղծություններ: Որպես արդյունք տքնաջան աշխատանքի վերջերս լույս տեսավ նրա հոյակապ գործը՝ «Նեղոսի հովտում» վեպը: Այս վեպը եղավ հանգուցյալի վերջին գրական ժառանգությունը:

Արամյանի հիշատակը միշտ թարմ կմնա մեր հիշողության մեջ:

Հանգիստ նրա աճյունին:

